

Zeitschrift: Igl Ischi : organ della Romania (Societat de Students Romontschs)

Herausgeber: Romania (Societat de Students Romontschs)

Band: 60 (1975)

Heft: 5

Artikel: L'integrazion pofessiunala e sociala dils invalids

Autor: Capeder, Dumeni

DOI: <https://doi.org/10.5169/seals-882398>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 30.07.2025

ETH-Bibliothek Zürich, E-Periodica, <https://www.e-periodica.ch>

L'integrazion professiunala e sociala dils invalids

da Dumeni Capeder

L'emprowa

Sespruond da dilucidar il problem pertuccont l'integrazion dils invalids ni handicapai ella professiun e societad, sun jeu ina ga dapli staus cunscients dalla problematica arisguard quell'incarica sociala da gronda muntada. Gl'ei buca repercussiuns economicas, derivontas dalla recessiun actuala, che tschentan alla societad l'incumbensa d'integrar ses members tuccai corporalmein e spirtalmein d'in destin savens nuncapeivel e dir, mobein la veta sezza, che ha da neu en neu produciu invaliditads da naschientscha, sco era talas entras malsognas ed accidents.

Jeu hai gl'emprem empruau da crear in cert catalog da problems tenor il principi: co secumport'ins sco cau da personal, sco superiur, sco specialist per invalids ni semplamein sco concarstgaun enviers il tschiec, il suord, il senza combas, enviers gl'invalid mental? Limitaziuns d'ina vart e banalitads da l'autra che sepresentan en quei connex han sfurzau mei d'attaccar il problem en ina dimensiun pli largia.

Definiziuns?

Tgei ei quei insumma invalid? Vid tgi patertgein nus plidond d'invalids? Eis ei gl'um culla comba artificiala? Ni il tschiec enconuschents vid sia canna alva? Co stat ei denton cun ils numerus handicapai, vid ils quals nus vesein negina invaliditat: ils epileptics, ils malsauns cronics, ils malsauns psichics? Dat ei insumma ina definiziun digl «esser invalids»? L'assicuranza svizra d'invalids constatescha: «Invalids ei quel ch'ei entras in donn corporal ni spirtal dalla sanadad per adina ni per pli liung temps buca habels da gudignar sia existenza.» Basta quella definiziun? La sperdita d'in sulet det sa esser pil pianist in'invaliditat totala, ferton che la sperdita d'in entir maun ha negin'influenza silla habilitad da gudignar il paun d'in directur general d'interresa. Quent'ins quel era tiels invalids? Nus vesein pia che l'invaliditat dependa buca mo dil donn effectiv, mobein dalla situaziun professiunala e sociala, mo era dalla veglia e dall'ini-

ziativa dil handicapau sez da vegnir a frida cull'invaliditat sco tala. Sche nus plidein dall'integrazion ella societad, sche patertgein nus vid l'integrazion sociala digl invalid ella veta dils sauns. Dat ei quei? Tgei ei la veta dils sauns? Ina gronda part dils handicapai sesenta malgrad ils handicaps sauna. Era culla formulaziun «la veta dils normals» vegnin nus buca lunsch. Tgi ei normals? Astgein nus opponer als invalids il plaid «normal»? Ord motivs da lungatg e da definiziun essan nus pia fetg malsegirs – e quei ei mo in segn extern dall'entira problematica dall'integrazion.

Demananza enviers gl'invalid

Lein intercurir empau pli detagliadamein il cumpurtament dalla societad e dil singul enviers ils handicapai. Danunder vegn savens l'aversiun, l'antipatia dil saun enviers siu concarstgaun invalid? Tgei tenuta vein nusezs entupond in invalid? Eis ei cumpassiun, marveglia, simpatia, carezia proximala, recusaziun ni mo indifferentad? Las raschuns schain onz profund. Sco ils tgapers ners refuseschan il tgaper alv, piclond cuntinuadamein el, aschia secuntegn il carstgaun da millenaris enneu enviers tut quei che selai buca integrar ella norma fixada. Tier biars pievels primitivs, mo era tier quels che sequintavan appartener alla sfera culturala europea, per exempli tiels Spartans, era ei moda, ch'ins metteva affons naschi invalids d'ina vart e scheva murir els senza assistenza. Mo era el temps medieval vevan invalids ina tresta sort. Ferton ch'ins anfla el Veder Testament passus che han ina tenuta negativa evidenta enviers igl invalid, muossa il Niev Testament en biaras parablas ina tenuta da basa pli cumplaschenta. Mo han ils Cristians acceptau igl invalid totalmein els 1975 onns passai? Patertgeien mo vid il gob ella litteratura, il zieg malvugliu ella détga, la stria cul nas crutsch, dies ault e guoter ella praula ni era facticamein els process dallas strias tochen el gisiatavel tschentaner. Tut quei explicescha forsa, pertgei reacziuns faulsas ein aunc pusseivlas gl'onn 1975. Ils temps nua ch'ins privava ils invalids dil dretg da votar ein passai; bia resta denton aunc da far.

Quei excuors ella historia seigi perdunaus. Lein restar ell'actualidad e sedumandar co e nua las difficultads engravieschan nos sforzs.

Problems

Difficultads d'integrazion ein particularmein manifestas sil plan dall'architectura. Oz eis ei aunc adina pli lev da procurar ad in handicapau –

suenter la scolaziun respectiva – ina piazza da laver, che da procurar agli ina habitaziun accessibla malgrad siu handicap, pia che munta buca ina barriera architectonica nunsurmuntabla. Dapi decennis pretend'ins risguards pils invalids sil plan dalla construcziun. Pretensiuns tecnicas ell'architectura ein vegnidas formuladas daditg, las normas creadas dapi 1961; tonaton vegnan construcziuns erigidas senza risguardar quellas. Aunc adina observan ins en casaments moderns in ni dus scalems avon ils ascensurs, savens ord schinumnai motivs estetics. Tgei gidan platz da laver adattai commensuradamein als giavischs dils invalids, sche gl'access tiel post da laver (escha, scalas, ascensurs, trens, trams, autobus, passadis eav.) caschuna incaps nundumigneivels? Ins pretenda che l'applicaziun dallas normas citadas seigi colligiada cun cuosts supplementars exagerai; mo quei selai contestar pli u meins adina. Midar e rectificar edifecis ed installaziuns tecnicas ei carischia, risguardar las pretensiuns dils invalids gia tier la planisaziun da tals cuosta quasi nuot. In exempl: Schar naven la sava d'in esch per aschia possilitar il passadi da sutgas cun rodas cuosta nuot; demontar quella pli tard cuosta ca. 150 francs.

In auter problem d'integrazion entaup'ins al post da laver. Bein ein oz caus da persunal e superiurs promts d'engaschar handicapai ell'interpresa. Mo lu capetan savens difficultads cun conluvrers per ordinari simpatics e tschécs. La raschun ei denter auter quella, ch'il schinumnau saun supporta buca ch'in invalid ademplescha il medem pensum sco el sez. El sesenta degradaus sch'in donnegiau dil dies, in zieg ni in mutigliau presta ton sco el. Cheu ei aunc bia instrucziun, orientaziun e motivaziun necessaria per sragischar quella tenuta.

La tiarza difficultad d'integrazion lessel valetar sco la pli greva e problematica. Buca ils handicapai cun invaliditads corporalas visiblas, mobein quels carstgauns – seigien els invalids ni buc – che vegnan buca a fin ni cullas difficultads dalla veta sco tala, ni cullas relaziuns humanas fasshentan nus primordialmein. Malsognas dalla psica sco disturbis psicosomatics, depressiuns nervusas e dall'olma representan pil laic egl ambient dil malsaun in problem quasi insuperabel. El sesenta surdumanhaus, daventa malsegirs avon la malsogna buca palpabla. Las consequenzas ein: retenientscha, resistenza, nuncapientscha e refusa. Che quei agir stauscha il malsaun psichic aunc pli afuns ella depressiun ei clar. La fin ei buca greva da s'imaginar: separaziun, internaziun clinica, stabiliment special e pér memia savens il suicidi...

In cass

Lein observar per illustraziun in cass ella pratica professiunala, in cass denter mellis, in cass che sa pertuccar mei, tei, oz, damaun.

Il collaboratur, la collaboratura, ha in accident da traffic, dil qual el serevegn buca pli aschia ch'el sa continuar cull'activitat sco tochen dacheu. Probablamein eis el duront liungas jamnas buca habels da luvrar. Ins ha tractau el cun beinvlentscha, simpatia ed oravontut cun cumpassiun. Visetas, brevs, auguris, pachets da Nadal, admoniziuns, cussegls... Mintgin vul gidar, vul mo il meglier; adina puspei: «*tut bien!*». Mo la lavour resta; per part, sch'il superior risguarda particularmein il sventirau, resta ella liung temps nunfatga. E lu, ina ga el decuors dalla convalescenza – ni plitost nunconvalescenza – sedamond'ins schebein forsa in remplazzament fussi opportuns. Forsa, mo provisoricamein – ins sa mai...

Tgi savess dapli? Il miedi da fatschenta? Mo suenter in temps savein nus era: Il miedi ei precauts, stuend far prognosas pertuccont la readmissiun al post da lavour; capeivel. E tuttenina stat el avon nus, igl accidentau. El ei plein confidonza ed ha in attestat medical. Tenor quel seigi el immediat habels da luvrar tschien per tschien, ei seigi denton necessari ch'el effec-tueschi ina lavour nua ch'el sappi per part seser, per part star en pei e per part semover; mo caneras, puorlas, survetsch irregular vognien bucá pli en damonda – pia la formula classica. Purtar grev seigi scumandau. Ultra dil fatg ch'el stoppi aunc ir savens tiel miedi per terapias, seigi el diltutta-fatg sauns.

Cun gronda capientscha e beinvlentscha tedlein nus aunc ina ga la historia dalla malsogna cun detagls pli u meins novs e giavischein a nusezzi ch'il miedi hagi aunc prescret ina cura da treis jamnas, per aschia ver in temps da grazia, ferton che nus sperein d'anflar il post vacant el menaschi.

Cheu essan nus ussa, cun nossa biala politica sociala sillà bandiera dalla firma ed il cor plein cumpassiun reala pil pli disgraziau. Nus dein a nusezs in stausch intern: «Fuss il pli bi sch'ins anflass buca in post el menaschi da nies tagli!» Pia entschavein nus culla tscherca. Gl'emprem dumandein nus el sez tgei ch'el s'imagineschi, per aschia survegnir ina direcziun concreta. Gie quei sappi el gest buc; perquei seigi el vegnius tier nus; la fatschenta hagi franc e segir in post, ni plirs per selecziunar; ina schi impurtonta fatschenta sco quei...

Tier gl'emprem superior ha il sventirau, che sesenta aunc adina el cass da saver selecziunar e che sefa rars, buca la cuida. El vegli apparentamein sez buca propri. Tier il secund experiment anflein nus in cau grittentau,

perquei ch'il survetsch dil persunal hagi reduciu ad el sia quota da persunal. «Sche buca quantitat, lu qualitat; mo luvrers top vegnan oz en damonda; culs invalids mei tiel survetsch dil persunal sez!» eav. Gl'ei da se-disperar; veva buca gest quei superiur fatg cun bravura il cuors per trac-tament da persunal?

E cun regularitat stoica telefonescha il rehabilitau la damaun, duman-dond nua ch'el sappi entscheiver ussa sia lavur. Ins sa s'imaginari co ei va vinavon. Il cass dat al responsabel cul temps silla gnarva. El drova pazien-zia, damogn da sesez ed activitat nunstunclenteivla. Ed il potenzial da cumpassiu e capientscha ei era buca inexauribels. Il cass – quei ei igl in-valid ch'ei senza cuolpa.

Enconuschiantschas

Nus vesein entras quella descripzion empau ironisonta con greva l'integraziun sa esser per il menaschi ella pratica. Las raschuns externas ein buca adina decisivas per il nunsucces, mobein savens las fleivlezias hu-manas ed ils pregiudezis buca motivai e nungiustificai. Leutier s'aschunta aunc il fatg ch'il menaschi pertscheiva, examinescha ed exaurescha buca sistematicamein las pusseivladads potenzialas dalla firma per integrar handicapai.

E finalmein il suandont:

Ei vegn savens renfatschau a nus che l'integraziun sco tala sepaghi buca economicamein, ch'ils cuosts seigien memia gronds e che la rendita seigi en negina proporziun cullas expensas. Jeu sai buca co il lectur giudiche-scha la caussa; mia experientscha confirmescha atgnamein il cuntrari. Gl'ei clar che buca tats cass d'integraziun ein eguals; jeu vi buca generali-sar.

In mument ei per mei denton decisivs: Sch'ins sa evitar entras in'integraziun professiunala pagaments da rentas che van els tschiensmellis, essan nus gia ord motivs dall'economia publica ed industriala semplamein obli-gai d'integrar nos handicapai. Dasperas ei per mei decisiv che mintga integraziun sto corrispunder alla responsabladad economica e duei esser cunvegnenta e nizeivla agl invalid. Ch'ella sto contonscher ina prestaziun schi optimala sco pusseivel, ei ton pil menaschi sco pigl invalid dil pli grond interess. En entgins cass isolai drov'ei era la curascha da dir in NA decidiu, sche omisduas parts han cheutras mo disavantatgs; pertgei integraziun exercitada sco finamira propria creass gest quels disavantatgs che nus lein evitar.

Sil plan social ei l'integrazion pigl invalid sco per la societad da gronda impurtonza. Il fatg ch'igl integrau gudogna sez siu paun ed ei cheutras pli u meins dependents ni dil stat ni d'organisaziuns da caracter social, dat ad el la posiziun necessaria ella societad per guder stema e renconuschiantscha duida entras la communitad. Sentiments d'inferiuradad svaneschian, las pusseivladads che la societad offrescha ein accessiblas agli sco ad auters; el separticipescha dalla veta communabla e formescha sia veta tenor sia mira. Che la societad duei levgiar quei pass secapescha da sesez. Fa ella quei? Fa ella siu duer era enviers quels ch'ein per adina buca habels da gudignar lur paun da mintga di?

Conclusiun

Jeu sun pertscharts che las expectoraziuns sura numnadas cuntegnan nungiustificadamein in manco essenzial, numnadamein ils nundumbreivels sforzs positivs che vegnan fatgs pils invalids. Il spazi da quest tractat basta buca per descriver quell'acziun nuninterrutta che serepetta mintga di en mellis loghens da nossa tiara. Quellas acziuns valerusas e nuninteressadas entscheivan gia en famiglia, nua che geniturs e fargliuns adempleschan cun spért exemplaric lur obligaziun enviers lur members handicapi. Jeu patratgel era vid miedis e persunal da tgira ch'exequeschan la medema obligaziun en moda admirabla. Buca emblidarlein nus nossas instituziuns dall'assicuranza dils invalids e lur uffecis regiunals d'integrazion; lu las organisaziuns statalas e privatas che prestan di per di in pensum immens pil beinstar dils invalids; e per finir, ils invalids sezs che prendan enta maun lur atgna integrazion, che semettan ensemes per contonscher communablamein la realisaziun da lur pretensiuns. A tuts quels e biars auters che vesan lur obligaziun el ver senn e che nezegian mintga pusseivladad per gidar a levgiar la sort dils pertuccai, lessel concludend comunicar ils plaids d'ina mumma d'in affon invalid, plaids che san remediar nossa tenuta, mo che muntan era ina consolaziun ella lavour sociala pils invalids:

«Biars plaidan en connex culla tgira dils invalids adina puspei d'ina obligaziun, da sacrificis e prestaziuns extraordinarias; els emblidan mo meimia spert conta legria, con deletg, conta benedicziun, conta pasch e cumentientscha persunala quella tgira sa purtar a nusezzi. Buca mo il handicapau ei il retschevider, na, il tgirunz sez anfla en quella missiun ina finamira ed ina satisfacziun cumpleina dalla veta che survarga tutta pusseivladad da s'exprimer.»